

## Edizioni

- letto 1103 volte

## Petersen Dyggve

I.

L'autrier estoie en un vergier,  
s'oï deus dames consoillier,  
tant qu'eles pristrent a tancier  
et lor paroles a haucier;  
acotez fui lez un rosier  
desoz une ente florie.  
Dist l'une a l'autre: ? consoil quier  
d'un mauvais qui m'ainme et prie  
pour loier;  
amerai je tel chevalier  
coart por sa menantie?

II.

Uns autres me refait proier  
frans et cortois et beau parlier,  
et quant il reva tornoier  
en son païs, moillor ne quier;  
sages est et tient son cors chier  
sanz orguil et sanz folie;  
mais il n'avroit d'amors mestier  
qui tort a mercheandie.  
Au premier  
li fui cruelx a l'acointier,  
por le mauvais qui me prie. ?

III.

Dit la bone: ? Je di par droit  
que tres bele dame amer doit  
bon chevalier s'ele aperçoit  
que fins et læaus vers li soit;  
et cele cui avoïrs deçoit  
dame ne l'apel je mie:  
garce est, puis que l'on seit et voit  
que por loier s'est honie.  
Qui la croit

fox est et sa folie boit,  
quant de l'argent l'a saisie ?.

IV.

Dit la fause: ? Qui vos creoit  
de mesaise et de fain morroit;  
n'aing pas chevalier qui tornoit  
et erre et despent et acroit  
et en yver se muert de froit  
quant sa creance est faillie;  
ne quier que mes druz peceoit  
grosse lance por s'amie;  
orendroit  
prenez l'onor et je l'exploit:  
si verrons la mieuz garnie.

V.

? Tais toi, pute, va bordeler;  
je ne te puis plus escouter.  
puis que tu vuez a mal aler,  
nuns ne t'en porroit destorber.  
Coment porras tu endurer  
en ton lit vil compaignie? ?  
li voloit l'un des eulz crever,  
mais Gaces nou soffri mie  
au torner,  
ainz li ala des poins oster:  
de tant fist il vilenie.

- letto 659 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropea.let.uniroma1.it/?q=laboratorio/edizioni-284>